

情刀

玫瑰 ê 贖罪

建銘喙仔笑笑，tī 麻藥發作進前 khà hō 淑雅，電話無人接，建銘 kan-taⁿ 留一句「願 chit 枝手術刀 ē-sái 斬斷一切，一切我所犯 ê 過失，我是罪人，請你原諒 -- 我，我欠 -- 你 -- ê，後世人 chiah 來還」，就掛斷 -- ah。

Hit 枝利劍劍 ê 手術刀有白 siak-siak ê 刀喙 siòng 準準 ùi 伊 ê 手腕 hia liō-- 落 - 去，血隨噴 -- 出 - 來。伊 oân-nā 欣賞 oân-nā 發現伊 ê 血原來 mā 是燒 -- ê，soah 想無家己是按怎 hiah 無情、殘忍。親像自頭到尾伊是唯一 ê 罪人。Tī 手術房開刀 hiah 濟年，伊第一擺感覺手術房原來是 hiah 冷。

伊 ê 意識沓沓仔回 tng 過去伊 kap Anna 做伙溫存時 ê 夢境，Anna 完全無抵抗伊 ê 橫霸，顛倒是用乞討 ê 目神求 -- 伊，兩人 ê 肉體 saⁿ-kap，做伙抵抗外來 kí-kí-tùh-tùh ê 閒話。Anna leh kā 伊 iat 手，hit 个笑容親像伊故鄉白河 ê 蓮花 hō 伊心情無掛礙，in 之間情愛 ê 憑信 m̄ bat 斷 -- 過。

雄雄伊聽見淑雅ê聲，háu kah chiâⁿ 悽慘，「你 thài ē án-ne 來對待--我？你 kám 有良心？」

手術刀刀肉現出淑雅白死殺ê面腔、死絕ê眼神，一下仔 m̄甘ê模樣、一下仔喙角激翹翹 leh 奸笑，親像 leh 欣賞伊ê尾路。

冷氣風口 sng-sng 叫，總--是，愛情ê火爐猶原無法度來消滅。死亡ê khùi 絲早就 tī 手術房 bih tī 壁角隨時 leh kā 討命。手術房是建銘ê地盤，死神討厭--伊，siáng 知伊家已揣死，死神凡勢 mā 感覺驚惶，bē 赴來準備，soah hō 伊 ke 幾若分鐘去回顧過去ê罪孽，koh 有上思念、上掛意ê人 kap 事，是 m̄ 是有啥 mih iáu 未完成--ê？總--是，伊家已 beh 揣死--ê！就算是逼--著--ah，mā 是家已做得來--ê，無啥好怨嘆--ê。

自殺就 ē-sái 解決一切？He 是逃避！建銘伊家已 mā 知，不而過 chiâⁿ 實無步--ah。為何無法度堅持愛情？愛情 koh 是啥 mih？是按怎愛情 kap 親情 m̄ 是全一條理路？人活 tī 世間有影 ài 有真大ê勇氣，若無，就 ài 真自私，chiah 活 ē 落--去。讀 hiah 濟冊，出社會 hiah 濟冬伊 chin chiah 了解，所有ê智識 kap 理性 lóng 是 am-khàm 家己心內深底ê lah-sap niâ，是一種妝 thāⁿ ê 藝術。

「若有理路，就 bē 選擇絕路--ah！」

家己 soah 對家己問 chit 款問題感覺愛笑。伊ê血 tī 塗跂直直澀，親像伊送 hō 淑雅 999 蕊ê玫瑰花 hiah-nī 仔紅，淑雅歡喜 kah。伊 mā bat 送 hō Anna 過，chit 件代對淑雅來講是一種侮辱，下賤查埔人 phāⁿ chhit 仔ê招數。總--是，人 lóng 逃閃 bē 過熱情

ê火紅，啥 mih 仁義道德燒 kah chiâⁿ 做火 hu。

Hit 種紅 koh hō 伊想起淑雅 leh 生 in 第一胎ê時、大出血ê情境。囡仔有平安，淑雅 soah 險無命，hit 時伊有影真 m̄ 甘淑雅，講 beh 好好仔對待伊一世人。Hit 種紅 koh hō 伊想起 Anna ê 喙脣紅 hám-hám ê 胭脂，親像吸石吸伊ê神魂，伊無才調控制，mā 想起 hit kái Anna 穿 khōng-pú-lè-sà 衫運動時好身材ê模樣。Hit 種紅 koh hō 伊想起結婚 hit 暝淑雅紅 thàng-thàng ê bu-là-jia kap 內褲，伊 kā 淑雅講過伊真 kah 意 hit 種火紅ê色水，完全 kā 伊男性ê ho-lú-bóng kap 氣魄點 tòh。

雄雄感覺 tī beh 死進前，koh 幻想 che 情慾ê畫面，家己有影是精牲、變態，lah-sap koh thái-ko。死後，伊猶原是一个風流鬼。

建銘當然對淑雅有寡情意 kap 歹勢，畢竟伊 kap Anna 偷來暗去已經有--一-站-仔--ah，而且淑雅ê腹肚內 koh 有--ah，koh-khah 害--ê，Anna mā 有--ah。囡仔 bē-sái 無老爸，伊 beh 按怎做？

A-him 講查埔人 lóng 是「喙唸經，手摸奶」，我想有影我 mā 無答案，別人ê家仔伙代阮無才調評論。不而過，我想建銘的確 bat 想過好好仔 kap 淑雅共度一生，án-ne Anna--leh？雙跂踏雙船，伊 mā 是 bē-sái 反背放 sak 任何一個。Siáng 知 Anna 哪 ē 來冤屈死，伊 bē-sái koh 錯誤--落-去，koh 再傷害淑雅，只好家己來贖罪。

冤屈？Mài問我是按怎知，請 hō 我一點仔私人保留 ê 空間，我 kan-taⁿ ē-sái kā 你講 Anna 是我上好 ê 朋友。事實是按怎我感覺已經無重要，就 hō 悲劇結束就好，che lóng 是世間 ê 考驗，選擇 kap 因果。愛情、情愛我實在無法度解破。

看著鬼

A-him 趕夜班拄到病院停車場，車 tū 好 niá，目睷前一个影，穿醫生衫、舌仔吐吐、面仔白死殺，目神 ná 烏空 beh 吸人 ê 神魂。A-him 驚 kah ná é-káu，無法度 chhan 叫 hoah-hiu，he thài ē 是人？

是鬼，絕對是！規身 ná hông hē 咒，雙跂無法度徙動，規身軀直直 chùn、起畏寒。時間無張持結霜，空氣摻 lām 麻藥全款，che 一切 hiah-nī 真 koh hiah-nī 虛幻茫茫。

「葉小姐，你也有看--見--oh？」A-him 到守衛仔福伯--à hia，話 soah 吐 bē 出--來，人 ná tiòh 猴講話大舌。福伯 bē 輸 bat 看--見 ê 款，看 A-him 驚 kah m-chiāⁿ 人想 beh 笑，應 kah chiāⁿ 自然。

「Hit-lō hit-lō……koh 來--ah！死 m 知 tng，我看 kah lóng 無感覺--ah。伊對生了 khah súi ê 查某因仔上有意見，我 che 老查埔伊 mā 無看 tī 眼內。Ai-iō，可憐--oh，怨氣 hiah 重，何 mí 苦--leh！」

「Hit 个是急診室 ê 陳醫生--lah，頂頂個月吊 tâu 死--ê，夭

壽--oh，腹肚內 koh 一个，hiau-hēng--oh，hiah 想 bē 開！」

「陳醫生，就是開刀房 hit 个……。」

A-him 聽 kah 起大聲 háu，拜託福伯--à chhōa 伊去樓頂上班，無，ài khà 電話 hō 伊長--ê (tióⁿ--ê)，問講是 m 是 ē-sái 請假，beh 叫我來 kā 接。後--來，我連 sòa 載 A-him 上下班，koh 刁意故 seh 過 hit 个停車場，一箍 siâu to 無，檢采我八字重，mā 可能伊知我是基督 ê 子民，chiah 放我煞。不而過，hit 位停車口號碼 1314，我若駛--過 lóng 有一種 chiok 奇妙 ê 感覺。我目睷無人講 ê hit 種邪目，看 thàng 陰陽間，以電子電機科學 ê 觀點，hia 定著有 chiok 強 ê 電力磁力空間。

我無 koh 再深想 chit 款背後可能 ê 理學解 soeh。自來我 tī 大學電磁學 m bat 考有入格--過，是我去拜託老師，老師知我愛寫詩，叫我寫一首拄 siàu——詩名我 iáu ē 記--得：〈愛--著 khah 慘死〉——chiah 勉強 hō 我 60 分--ê。話 khiú sioⁿ 遠，在來我對神鬼無啥信 táu。若是有，mā 無要緊，橫直我也無做啥傷天害理 ê 代，bē 來揣我 chiah tiòh。若看--見，lán 就笑笑 say hello 就好。

內底女主角我後--來 chiah 知是 Anna，我是看新聞 koh google chiah 知--ê。自從結婚了後我就 m bat kap 伊見過面--ah，阮 ê 戀情 chiāⁿ 短，無啥好 thang 講--ê。伊哪 ē 去 kap 有婦之夫 leh 交往--leh？Koh kā 代誌舞 kah án-ne，腹肚 koh 有身！我 soah 感覺真艱苦。我無表現--出-來 hông 發現，過去有緣鬥陣，總--

是有寡感情 tī--leh。

我無 kā A-him 講我 bat *Anna*，我想，che 已經是過去--ah，保留一寡私人空間是一種權利。是講，我逐 táu 載 A-him 去上班 ê 時，soah 希望伊 ē-tàng 出現 hō 我看--一-下。是講，我 mā 是 hō 伊 bat 傷心--過 ê 查埔人，伊應當 mā 無願意 koh 再看--我。直到有一工，我 chiah tī 夢中看見伊……只是伊無講話，kan-taⁿ tím 頭 bē 輸 leh kap 我 sio 辭。

三角緣

Chit 件三角戀情已經 m̄ 是新聞--ah，*Anna* 是一位急診室 ê 醫生。啊若男主角是全急診室 ê 同事建銘，建銘 in 某淑雅 mā tī 全病院上班，m̄-koh 是 tī 長照病院 leh 做，kap 阮某 A-him 全單位--ê。Chia-ê 代誌 lóng 是 A-him 講 hō 我聽--ê，我 kan-taⁿ 想病院箍仔 chiāⁿ 亂，醫生有錢有地位，頭腦 koh 巧 ê 形象的確 hō 人欣羨，又 koh 長時間 ê 壓力，tiāⁿ 聽見男女同事之間有曖昧，che mā 是合理--ê。

合理？A-him 對 che 看法 chiāⁿ 無認同。我應伊社會不公不義 ê 代誌 chiah 濟，人若無法度改變，總--是 ài 揣一个出口 thang tháu，無，ē 起痞。

有一 kái 都合我 bat 看過淑雅，人 chiāⁿ 好，hit 種好，就親像人講 ê 好新婦 ê pān。建銘我 mā bat 看--過，無我 ê 緣，講話

kap lán bē hah，鬥陣做伙 lán 的確有感覺一種階級 ê 差別。Hit 時我 koh m̄ 知 *Anna* leh kap 伊交，所以 bē 去 kā 怨妒。Hit-tang-chūn 淑雅約 in 同學六、七个 sio 招去旗山 khau 紅菜頭。Khêng 實，he 是淑雅刁意故 ê 安排，希望建銘 ē-tàng 好好仔陪 in 母仔囡，順 sòà hō in chia-ê 同事知影 in 翁仔某 ê 感情是 iáu 有機會--ê。

我看 ē 出實在是伊內心查某人 ê 軟弱 kap 無力，koh 驚同事 ē kā 笑，笑伊輸 hit 个查某人 ê 妖嬌。伊 ê 眼神有一款鬱卒哀傷 ê 美麗，hō 人有淡薄仔 m̄ 甘。Chit 款代誌若發生 tī 查埔人身--上，全款 mā bē 堪--得。查某人的確有 siō-siāng ê 心理 chiah tiòh，m̄-tiòh，凡勢 koh-khah 強。Koh 再講，厝內 koh 有兩個 3、4 歲 ê 囡仔，不管按怎翁定著是 ài 搶--tng- 來！拄領結婚證書 ê 我，mā leh 想 hit 張薄 hiuh-hiuh ê 紙有影真重，bē-tàng áu、bē-tàng 折，若變形就歹回頭--ah。

我有一 kái bat tī 病院停車場影--著，建銘 leh kap 人暗會。當然 in 完全無注意著我，我 mā 恬恬欣賞現場 ê *liveshow*，是 A-him 來 kā 我 khiú 走 chiah 看無了。若是 hit 時我知影是 kap *Anna*，我 ē 按怎反應--leh？論真講，我實在無法度想像。落尾，chiah 知是淑雅 in 翁 leh 偷食，查某--ê 拄 ùi 醫學院畢業，情花拄開，soah hō 查埔 ê 花言巧語來騙--去。頂 koân 講--ê 是我 ê 看法，啊若 A-him 就 ē 講兩個 thái-ko 人，尤其查某 hō 伊罵 kah ná 破 bá 全款。

Haihⁿ，查某人對查某人 chiāⁿ 惡。

情愛ê看法，lán無啥經驗好thang講，畢竟lán m̄是聖人，凡若查埔人，活一工就ē tī情關頂koân犯罪iā-kú-káⁿ，不管心理iah是生理上，直到伊死hit工。我mā leh想身軀邊一寡同事不sám時leh臭彈kap外口ê女朋友按怎挂按怎，身材佻位膨佻位翹，tī眠床頂ê工夫佻好挂佻好，聽kah面仔lóng紅紅hōng-hōng，心狂火tòh。Che kám是有道德上ê問題？我soah感覺有淡薄仔見笑，褲底hit尾liu無張無持變大，我ê心bē輪開始跳車鼓。醫學上，che是真正常--ê，我án-ne安慰家己。我soah mā有淡薄仔思念Anna，是佻一款思念，我真歹勢講。

「你講--啊，chit个查埔是m̄是chiok下賤？偷食，koh偷食全病院ê同事lóng m̄驚hōng講？」A-him氣phut-phut leh問--我。

「感情ê代誌本底就chiāⁿ歹講--ah。當然結婚--ah，koh tī外口烏白來是不應該。是講，人兜ê代誌無好批評。任何代誌lóng有前因後果，你m̄-thang sioⁿ chhap手，無，到尾舞kah規身軀臭chho。」我án-ne應。

「Lín查埔人lóng替查埔講話。」

「……」

A-him逐工tng--來，lóng kā我報告in hit陣同事leh討論按怎對付建銘kap Anna hit對狗男女。我是聽kah chiāⁿ siān，以我ê經驗來看，che定著無好處理，若是公親變事主，有影是我ê經驗來看，che定著無好處理，若是公親變事主，有影是夯枷。心內mā好玄偷食ê人ê心理，chit款想法m̄知是m̄是一種變態，iah是過去戀情ê記持浮現tī眼前。愛情ê宿題kap結

婚了後ê親chiāⁿ關係定著是無仝--ê，按怎無仝我khêng實分bē清。而且聽sioⁿ濟a-sa-puh-luh--ê，顛倒是一種反教育，我甘願tèⁿ臭耳聾。

「查埔人有影下賤！看--起-來生做緣投仔緣投，想bē到ē做chit款代誌？」A-him氣phut-phut leh唸，phàng是koh聽見新ê發展，bē輪逐工電視劇leh搬戲全款。Chit句話有小可chhák著我。

「看外表？Lín查某人m̄是lóng án-ne？我無hit-lō phì-siòⁿ ê意思。M̄-koh，hōng騙--ê kám m̄是lóng án-ne？緣投仔sàng講--兩-三-句-仔，若koh有錢就隨tòe人走！講啥mih真愛，我chiah無leh信táu。Lín lóng hō hia-ê韓劇騙--去--ah。一大堆人ē-hiáu講大道理，唸經摸奶--ê chiāⁿ濟--leh。」家己話講--出-來soah有心虛ê感覺。

「Ehⁿ，淑雅講建銘以早jiok--伊ê時，對伊佻好--leh，liam-mi送he liam-mi送che，koh hō伊一張信用卡無限金額--leh。Chit-má--leh，一禮拜無三工tī厝--裡暍，lóng kap外口hit个做伙。你有leh聽我講話--無--lah，氣死人--neh。」

A-him愈講愈火大，kám講in查某人lóng想beh hō查埔人tng--來？若tng--來kám有法度扯hō離？Chit款問題soah沖入我ê腦海，一時無法度心靜--落-來。

「Oh，你管人hiah濟beh創啥？Ah無你ê代--lah。Chit種問題聽sioⁿ濟ē起瘡。」

「M緊替淑雅想一下仔辦法，hō in 翁 mài koh kap 外口 hit 个烏白 lām-sám 來。」

「以我ê想法來看，m-thang chhap che--lah，無細膩舞 kah 家己一身軀臭，m 值--lah。」

「你知影--無？淑雅 koh 有身--ah！Hit 个賤人 thài ē án-ne 做！Koh hoah beh 離婚，你知--無？伊已經 kap 外口夥計仔買厝做伙躑--ah。」

「放兩個囡仔，腹肚 koh 一个，心肝有影雄！Án-ne，伊 ài kā 討囡仔 ê chhiáⁿ 養費--lah！Chit 點 chiáⁿ 重要，若行到 chit 个坎站，人走--去無要緊，錢 ài 留--落-來。囡仔ê未來有 khah 濟保障。額頸生瘤，無 ta-ôa！」

「伊家己 ē-tàng tng--來，當然上好。伊 kám 無責任？」

「有錢就好--ah，責任？查埔有錢、有才華，有影 ē 烏白來！Chit-má，某有身 koh beh 去外口揣查某，有影 chiáⁿ 可惡。Che bē 有好尾溜--lah。淑雅ê想法是啥？Che，我看，無好收煞，無定著 koh ē 出人命。無適合，提早結束 mā 是好--ê。」

「無可能--lah，淑雅 koh 有身--leh。In 老爸 koh 倒 tī 病床。伊無可能想 bē 開--lah。」

「Án-ne 代誌 hēⁿ--leh mā m̄ 是辦法，上好 ài 替家己想--一下，khah bē 時到人財兩失！Beh háu 無目屎！」

「你是講掠猴？」

「Hohⁿ，你有影電視看 sioⁿ 濟。我是講法律層次ê問題，

che 是上無伊 ē-tàng 保護家己--ê。」

「阮明仔載 sio 約 beh 去赤崁樓 hia ê 武廟斬桃花，聽講佹靈 siáⁿ--leh，就 m̄ 信關公ê刀斬 bē 斷！」

「你 mā 好--ah，你是 leh kap 人行教堂--neh！緊睏--lah，等--leh，上帝就來 kā 你 pa 頭！」

阮 beh 睏進前 lóng 是 leh 討論建銘 kap 淑雅 in 兜ê代誌，A-him tiāⁿ-tiāⁿ 講 kah 一半就睏 kah 十三天外 kôⁿ-kôⁿ 叫，放我一人 leh khók-khók 想。雄雄有替淑雅抱不平，心情 soah 艱苦--起-來。雖 bóng 我贊成男女平等，總--是，我了解男女交往 iah 是現今社會生態，女性 éng-éng 是弱勢，che 是 chiáⁿ oh 改--ê，尤其生囡仔 chit 項代。我 kā A-him 講淑雅 chín 腹肚內ê囡仔應該 ài 提掉，無--者，凡勢 ē 過了 koh-khah 痛苦。A-him 認為我 chiáⁿ 殘忍，總--是，mā 感覺 án-ne 對淑雅 khah 好。

其實建銘有要求淑雅 ài kā 囡仔提掉，淑雅 soah 堅持 beh 生--落-來，che 是我後--來 chiah 知--ê。建銘有影心 chiáⁿ 雄。淑雅是用啥 mih 心態想 beh kā 囡仔生--落-來--leh？一个母親對性命ê m̄ 甘 kap 囡仔ê疼惜？Iah 是 m̄ 願意 hō 建銘 án-ne 爽幾十秒，就越頭做伊去揣夥計仔？愛原來是 ē 變質--ê，mih 件 m̄ 是囡 tī 冰箱就 bē 歹，有期限--lah。若是 beh 用囡仔 kā 建銘縛做伙，實在無啥路用，兩個大漢--ê to 無 leh chhap--ah！囡仔 m̄ 是 in 愛情ê防腐劑，beh 哪 ē-sái án-ne 做--得？

愛--著 khah 慘死

明視台語新聞報導：

今仔日半暝3點半，尚美醫學中心有一位姓陳ê查某醫生 hōng 發現死 tī 浴間仔，警方目前無排除自殺 kap 他殺ê可能。死者衫仔褲 lóng 褪了了，死前有可能 hōng 踏躡--過，兩條手機仔充電線 kat 做伙纏 tī 領頸，無人聽見 hoah 救聲、無任何 sio 拍ê影跡。面腔看 bē 出有嗒痛苦，鼻空 kap 目矙有流寡血水。水道頭ê水無禁，水流 kah 排 bē 離，tū kah 規浴間仔是一 phiàn 血水池。警方到現場ê時，一時 m̄ 知影 beh 按怎來處理。Hit 个查某醫生死進前，有 khà 電話 hō 伊兩位同事，警方開始 ùi chit 條線索來調查，ē 安排 in 來說明了解，排除社會ê不安。

「笑死人，社會不安！社會不安 lóng 是 lín chia-ê 報新聞--ê--lah。Hohⁿ，講 kah bē 輸 tī 現場--leh，小尊重家屬--ê--lah。盡報 lóng 報 che，剖人、放火、自殺--ê。愈看愈風火 tòh。」

M-tiōh--neh，he m̄ 就是 A-him in 病院？

A-him hit 暝就 kā 我講--ah。是 hit 个第三者死--ah，hiah 拄好！講腹肚 koh 有身，真 hiau-hēng！

Thài ē hiah 想 bē 開！囡仔是無辜--ê。伊講前幾日 kap 淑雅值夜班，伊規个人無神無神，koh khà 電話大細聲 jiàng，親像

beh 揣 hit 个夥計仔 péng。現 chūn 出代誌，希望 ē-tàng 平安收煞，m̄-thang 做 gōng 代誌。

「出人命--neh！叫你 m̄-thang chhap hiah 濟，時到 hōng 叫去問代誌 ke 衰 siâu。」

「拜託--leh，he 是自殺--neh。上好家已有覺悟，雖 bóng 是悲局，總算是對 chit 段三角戀情有一个交代。Iáu-m̄-koh，代價 sioⁿ koân--lah。照我講，beh 死，查埔上應該死。」我講了，心 mā 是 chiâⁿ 虛，總--是我的確是 án-ne 想。

「無錯！規懺好好。」A-him 隨應。

Hit 暝 A-him mā 是暎 kah kôⁿ-kôⁿ 叫，我暎無好，隨起來拍開電腦 beh 寫寡 mih 件，soah 無張持去 Google gu--一-下。無 gu--無-打-緊，soah 發現原來 hit 个姓陳--ê，是 Anna。

心情 ná sap-sap 仔雨，我行入一个夢，我 kap Anna tī 九份仔手牽手 tī 山城彎彎 oat-oat，重重疊疊，感受兩人手中ê燒 lō，伊淺淺ê笑容，有講 bē 完ê情話。雄雄，亂鐘仔起狂叫，天光--ah。Anna 哪 ē hiah gōng--leh，去交 he 有某有囡ê人。「愛--著 khah 慘死」，伊 bat 對我講--過，我 koh 寫一首詩 hō--伊。

伊真正敢為愛來死！我 soah 替伊感覺勇敢，顛倒感覺少年時對愛情是 án-ne 無成熟看待。到 taⁿ，我 iáu-koh sa 無 cháng。An-ne 死--去，kám 有影對家已有交代，厝內父母--leh？

伊是 hiah 巧ê查某囡仔，無可能自殺，絕對無可能。我 m̄ 相信！自 hit 工，過去 Anna ê 形影 koh 出現 tī 我ê頭殼內，kap 我

ê 影跡全款，按怎趕 to 趕 bē 走。

電話通聯記錄調查結果，尾兩通電話 lóng 是 khà hō 建銘 kap 淑雅。伊 kap 淑雅通幾若通，koh 講 chiáⁿ 久。Chit 段三角戀情已經是新聞照一工 24 點鐘無歇 leh 放送。警察 mā 開始 ùi 他殺 ê 路線去調查，新聞媒體比警察 khah 骨力，警察 koh ài 請 in 提供新 ê 線索。A-him 講淑雅歇假 -- 去 -- ah，可能是有壓力，koh 兩個月 beh 生 -- ah。

自從 hit 工了後，病院暗時濟濟人 sio 連 sòa 看見親像 Anna ê 形影行過來行過去，病院方面有請司公來招魂，聽講 lóng 招無，司公講冤氣 chiáⁿ 重；tng-- 去了後 m̄ 知影按怎三工 bē 食 bē 暍、人 siān-siān，雙目 ná 食毒 ê 人 kiōng-beh khiau-- 去。

不管日 -- 時 iah 是暝 -- 時，護士醫師 lóng m̄ 敢一个人巡房，病房內有 ê 患者看著醫生來，就叫：「陳醫生你來 -- ah-- oh，chiáⁿ 久無看，愈來愈 súi--neh！」查埔醫生驚 kah lóng 講 bē 出話，喙齒 ki-ki-chùn。有 ê 患者看 kah 活 beh 驚 -- 死，半暝直直 hoah：「Mài koh 來 -- ah，我 chiah 燒 hō-- 你，我 beh 來 tng-- ah，無愛踹 chia--lah。」

Hit 間浴間仔，半暝三點外水道頭無人開 soah 家己 leh làu 水，規間浴間仔 lóng 是血，piáⁿ 掃 ê 阿婆驚 kah 心臟病發作，佳哉有救 -- tng- 來。落尾手，病院院長 chiah 願意 kā hit 間浴間仔封鎖。兩條黃 húaⁿ 黃 húaⁿ ê 帶仔拍一个大大大 ê 叉仔，頂 koán 寫「施工中，m̄-thang 倚近」。

「有淑雅 ê 消息 -- 無？」我問 A-him。

「可能 beh 生 -- ah。In 翁 mā lóng 有 tng 去暍 -- ah。親像關係有 khah 好 -- ah。」

「Chit 款查埔有影……chiáⁿ 害。Anna ê 死伊應該 ài 負責任，伊 bē 好尾 -- lah。」

「……你哪 ē 知影 Anna ê 名？」A-him soah 一時變精光 -- 起來。

「無 -- lah，你是無 leh 看新聞、Facebook--oh。」

建銘 mā 是有 leh 去病院上班，刀照開。總 -- 是，身軀邊 ê 人除了公事以外，lóng 無願意 beh chhap-- 伊。Éng 過開刀伊 lóng 放 hit 款輕音樂，最近 soah lóng 放 chit 首歌〈今生愛過的人〉，護士講 án-ne 可能無適當，建銘應講 chit 首是 Anna 上愛聽 -- ê。護士 soah 舌仔吐吐，起 ka-lún-sún，m̄ 敢 koh 應話。

建銘開刀開 beh 了，護士 beh 收尾 ê 時，伊 lóng ē 唱 hit 句，雙手親像抱一个人 leh 跳 làng-sù。

「啊……啊……m̄-thang 辜負阮 ê 人，啊……啊……你是我今生永遠 ê 希望……」

聲音不止仔哀悲，koh 親像內底有查某人 ê 聲音。逐个護士走去 kā 護理長投，講以後 lóng bē giàn tòe 建銘 ê 刀，甘願去加護病院顧 he 重症患者 mā khah 贏。

有人 bat 看過建銘皮包內 koh 有 té Anna ê 相片，kâm 目屎 gōng-gōng 仔笑 chhng-chhng-háu，有人懷疑建銘是 m̄ 是起瘡 --

ah。Anna是m是有來揣--伊，揣伊報仇？我m是講伊是兇手，論真伊ài負上大ê責任。Beh講嫌疑，淑雅mā有可能？總--是，淑雅是hiah溫純ê人koh有八個月ê身！不而過，兇手一定ài掠--出-來！

「Chit款三角戀情，每一個人lóng是失敗者。」我kā A-him講。

「Hngh，查埔--ê上爽--lah。爽了就走，lóng留查某來拭kha-chhng。」

「講án-ne，一屍兩命--neh。Khah絕情ê人māē艱苦。」

A-him無相信我ê話。我想是m是伊過去mā受著別个查埔ê欺騙，chiah對查埔hiah-nī chheh心。

聽講驗屍報告出--來--ah。病院內ê醫生護士chhi-bú-chhih-chhū踮辦公桌頭前、踮便所、踮壁角lóng leh傳Anna是hông人hē毒chiah hông催--死。

「Án-niâ-ôe，莫怪--oh，半暝現身是beh揣兇手--lah。M去揣兇手踮chia háⁿ--人，lán ah無得失--伊--ah。」

「你mài烏白講--lah，chiok恐怖--neh。」

眾人你一句伊一句，A-him tng--來隨kā我報告。

「看--起-來，兇手是建銘--ā，有影是知人知面m知心。伊若無愛--伊一開始就無應該án-ne，koh剖人！」

「你是檢察官--nih！愛若hiah-nī簡單講ē清，就無世界大戰--lah。一切lóng是自私--lah，siáng lóng全款。Tiòh m-tiòh m是外人thang講tiāⁿ--ê。人若伊剖--ê伊mā走bē過。走ē過，心內

一世人lóng有hit个烏影纏tòe tiâu-tiâu，活--leh ná死人全款。」我應kah性地有寡夯--起-來。A-him有驚一tiò。

「世界大戰，你kám ē牽sioⁿ遠--ah！」A-him已經慣勢我講話ê方式，任何代誌lóng想東想西。

頭殼內直直想chit件代，有影忝頭koh影響生活kap作穡。Koh再án-ne實在bē用--得。Anna kám是建銘害--死--ê？若是án-ne，Anna絕對bē放伊煞。

我有偷偷仔去kā Anna liam香。Hit日kap九份仔hit日全款落綿綿仔雨，擲一枝雨傘ná peh崎ná想起阮兩人第一擺出遊ê形影。看見Anna靈堂ê相片，我鼻頭一下酸，目箍一下燒，嚨喉親像一枝魚刺kéⁿ--leh，講bē出話。我ê手soah有感覺一个燒氣thàng--過-來，直直thàng過身軀，規个kha-chiah lóng燒--起-來，抵擋今仔日生冷ê九降風。我知影Anna tī chia，伊是來拍招呼--ê。我心頭暗唸過去hit段情真對不住--伊，mā唸伊為何hiah gōng、kā家己舞kah án-ne。伊lóng恬恬。我ê心情káⁿ-ná hit kái約伊出--來，去看飛行機起飛kap降落全款，起起落落，koh親像leh笑--我，其實是伊先放sak--我--ê。

笑bùn-bùnê遺相，伊ê紅tiù-tiùê喙脣leh tín動，我耳仔khiú長長soah聽無伊講啥，一chūn風掃--落-來，將每一字kap塗跔ê eng-ia lām-lām做伙。心內向上帝祈禱，ē-thang hō伊倚靠上帝ê疼thàng。

名叫 Anna ê 囡仔

天氣講變就變，拄落雨了，地氣直直 chhèng--起-來，遠遠 ê 天頂有 chiáⁿ 厚 ê 烏雲 ùi chia 飛--來，我知影應該 ài 來 tng--ah。空氣 àu-hip-àu-hip，hō 人心情 chiáⁿ 無爽快。我 tī 太平間外口，點一枝薰，有一隻燕仔 tī 天頂飛 sèh，我想 he 可能是 Anna ê 化身？是 m̄ 是揣無厝 thang tng？我吐一个大 khùi，伊 soah 飛無--去。Kā 沉重 ê 雙趺徙去太平間，表明 beh 看 Anna 一面，管理員講家屬 iáu tī 內底，我看簽名簿仔頂有建銘 ê 名，心內 soah 有寡躊躇，到底 beh 入--去 iah 無。

我沓沓仔倚近，冰櫃房內無我想像--ê 有 hit 款 àu 味，冷風直直 ài 我維持理智。總--是，tī chit 个空間任何 mih 件 lóng bē 輪是死--去--ê，若講話 iah 是出聲，hia ê 死人就 ē hō 你叫--起-來。

「歹勢，是我 m̄-tiòh，一切 lóng 是我造成--ê。害你無故來死，koh 害死 lán ê 囡仔。」He 是建銘 ê 聲，我 ē 認--得。兇手有影是伊？真正有人 hiah 雄？M̄ 是伊是 siáng？

「我無法度原諒家己，請你原諒淑雅，伊 m̄ 是故意--ê，一切罪人 lóng 是我，是我對不起--lín。我 ē hō lín 一个交代。」

冰櫃房霜冷 ê 空氣 hō 我忍 tiâu 腹內火，我 ná 探偵全款想像代誌發生 ê 前因後果，kap Anna 按怎 hông hē 毒，按怎 hông 殺害 ê 過程。我頭殼內出現一幕 koh 一幕烏茫茫 ê 情境……。

「歹勢，我 ài 做一个結束！你 kap 淑雅之間我 kan-taⁿ ē-sái 選

擇一个。」

伊 tī Anna ê 耳空邊 án-ne 講。伊事先早就 kā 毒物 chhoân 好勢，準備 beh hō Anna 好好仔走。Tī beh 死進前 koh 再享受糟躡--伊、sng 弄--伊。建銘用伊敏感 ê chéng 頭仔來記憶 Anna 肉體任何一个所在，koh 用伊講白賊話 lóng bē 拍 kat ê 舌 lā Anna ê 耳後壁、耳墘，等 Anna 擋 bē tiâu ê 時，鑽入去伊 ê 心肝，了後隨用手机仔充電線 kā 催--死。Chit 種死法，phàng 是性變態 ê 人追求 ê 死法，tī 性 ê 高潮脫離人間，定著是快活--ê，Anna ùi 天堂摔--落-來，甚至 iáu 未感受著痛苦。伊 kā Anna 當做牲禮，beh 成就伊查埔人 ê 虛華。

伊 ê 目屎是假--ê，伊知影有人 leh 監視--伊，伊是 leh 演戲--ê。伊甚至 koh kā 講後世人 beh 娶--伊、hō 伊一个正式 ê 名份。

「我 beh ài 你做一个結束！我 kap Anna 之間，你 kan-taⁿ ē-sái 選擇一个。」淑雅起性地，完全 m̄ 管腹肚內 ê 囡仔，大聲對電話另外一片 ê 建銘 jiàng。

「我實在無法度 kā Anna 放 sak，伊已經有身--ah。」建銘 án-ne 應。

「我--leh，lán ê 囡仔--leh？你 beh 放 sak--阮？」

「Che 感情 ê 代誌……」

「你 m̄-thang 逼--我……」

「淑雅，你 m̄-thang 做 gōng 代誌，我 ē 補償--你……」

是堅強ê淑雅 hē ê 手！無人 ē 想著是一个大身命 ê 查某人 hē--ê。

我雄雄感覺想 beh 吐，Anna 面仔笑笑 tī 我 ê 面頭前，繼--來淑雅 ùi 我 ê 身軀邊行--過，bē 輸我是柴頭棍仔全款。Anna 倒手勻勻仔擰起來直直 kī--我，用 siāⁿ--人 ê 目神 kā 我講再會。淑雅大力 chàm Anna ê 腹肚，Anna 下體血直直流，總--是，伊 lóng 無出聲，用絕望 ê 眼神看--我，leh hoah 救人。我雙跤無法度徙，mā hoah bē 出聲。淑雅大聲 kā lé，罵伊 bē 見笑，破壞人家庭，大力 sàm 兩個喙 phóe。淑雅用雙手 tēⁿ Anna ê 領頸，ná 起痠 ê 狗咬--人咬 tiâu m̄ 願放。Anna 自頭到尾 lóng 無出聲，一點聲 to 無，kan-taⁿ 恬恬對我看，我啥 to 無做，mā 無才調做。

M̄ 知 tang 時，hit 隻燕子飛--入-來，是 tòe 我跤尾飛--入-來？是 tú-chiah hit 隻？

建銘已經離開--ah，凡勢伊智覺有人來，chiah 心虛趕緊離開！伊是兇手！

Anna 是 hiah 重感情 ê 人，談戀愛 lóng 是付出真心--ê，伊竟然 kā 伊剷--死。

我 beh 按怎做？Anna，我 beh 按怎做？

我揣著冰櫃號碼「1314」，suh 一口生冷 ê 空氣 kā 平台拖--出-來，gāng-gāng 看一時仔久 chiah 用 lāk-lāk-chhoah ê 雙手 thoah 開屍袋，我目屎隨流。看見伊甜 but-but ê 笑容，猶原 kap 十多前全款，kám 講伊 lóng 無怨嘆？

我想 beh kā 伊叫精神，m̄-thang 睏--ah。

「一个人若無愛--你，koh 按怎強求 mā 無路用，查某人 m̄-thang 提燒面去 ù 人 ê 冰 kha-chhng！」伊捌 án-ne kā 我講 in 男朋友踏雙船 ê 代誌。

「我 m̄ 是無人愛--ah，你講 tiòh--無？」伊笑笑 leh 講，bē 輸 lóng bē 傷心。

「我 mā 無應該 hō 伊操煩，伊 ná 囡仔--leh，就 án-ne 我家己 ē 想辦法處理。」

學生時代 ê Anna 是 hiah-nī 有才情、有想法 ê 人。總--是，伊 lóng 家己恬恬承受一切，mā m̄ 願意 hō 人看見伊流目屎。Kám 講是伊自願結束--ê，無可能！我 m̄ 願相信 che 是事實，絕對無可能！

目屎滴落去 Anna 白死白死 ê 喙脣，soah 漸漸反紅有血色，我 iáu ē 記得伊喙脣 ê 酥軟。Hit 隻燕子停 tī Anna ê 胸前掠我直直 siòng。我伸手 beh 摸--伊，伊 soah 變無--去，化做一蕊白霧雲。Hit 日 tng--去，我 lóng 無聲無 soeh，一人恬 chhih-chhih。A-him 問我啥事，我 iáu 是無講--出-來。總--是，A-him 知影我一定有心事。我是無可能 hō 伊知影我 kap Anna 有一段過去。

M̄ 是，是好朋友。Kám 講我 iáu 對 Anna 有寡思念！

Hit 暝，A-him kā 我講淑雅生--ah，查某--ê。規个生產過程，建銘 lóng 陪伴 tī 伊身軀邊。囡仔 mā chiāⁿ 健康。看--起-來，in 已經和好--ah。我實在 m̄ 願意 koh 聽著 in ê 代誌。害死人，kám

有資格享受幸福。*Anna*死--去--ah, che就是故事ê結局。愛情ê罪孽放hō伊來擔, kám有公平?我無法度理性看待chit件代誌, 情愛mā m是有理路thang講明--ê。

黨視台語新聞報導：

前一站ê尚美病院命案警方宣佈破案, 兇手是陳--姓醫生ê同事連建銘。今仔日hông發現tī手術房內自殺死亡, 警方判斷伊是驚惶hông發現伊kap陳--姓小姐有曖昧, koh hō in某來發現, beh揣伊談判, soah講bē好勢, 一時掠狂將伊劊--死。

過無幾工, 建銘就自殺--ah。我是看新聞chiah知--ê, 我心內並無任何giâu疑kap驚惶。

*Anna*ê死, 伊生本tiòh-ài有一个交代。新聞報--ê, lóng是風聲嘮影, 家己烏白鬥。是講伊koh放sak in某--ah, 短時間kap淑雅ê甜蜜復合, phàng是beh贖罪。放某放囡是伊專門科--ê。Chit種假君子定著是ài hông呷痰呷瀾。

我leh想, *Anna* kap淑雅kám ē原諒--伊? Che kap我無tī無代。愛, 原來是hiah自私ê mih。我是m是自私ê人--leh? 我bē輸mā看見家己內心深底ê lah-sap。

1--月山頂已經落雪, 天氣chiâⁿ好, 我peh上去樓頂ng東片看--過-去, ē-sái看見玉山ê山頭白siak-siak。我親像感受日

頭ê赤iâⁿ, 孤一人享受山脈ê氣派, 人世間ê òe-sòe暫時得著tháu放。Hiah大ê空間, 若koh ke出現另外一人, 絕對拍歹我ê心情。若愛情ê空間--leh? Che kám是自私? Taⁿ, 我koh想起*Anna*, 心內緊暗唸bē-sái koh陷tī in ê三角戀情--ah。正確來講, bē-sái koh再想我kap *Anna* ê過去--ah。

有一kái A-him koh約淑雅去旗山khou紅菜頭, 叫我做司機, 我真m情願。講是建銘死--ah, 爲著beh hō伊心情khah快活。一个人ài顧三个囡, 一个koh拄出世chiâⁿ辛苦。我對A-him ê雞婆性真無法伊, mā m知影按怎拒絕。失去翁婿, 伊定著是chiâⁿ艱苦--ê。

Hit日, A-him kap我chiah知淑雅kā紅嬰仔號做「*Anna*」。A-him kap我一時sa無cháng, 我bat想過是m是淑雅起瘡--ah。總--是, 伊看--起-來並無koh-iōⁿ, 對*Anna*不止仔用心照顧。無的確che是一種贖罪心理, iah是伊有牽涉*Anna*ê死? Koh iah是平平查某人對查某人ê疼惜? 我實在m願意koh想--落-去。Koh想--落-去, 我ē koh想起*Anna*甜but-but ê笑、無聲無soeh ê笑。

「我無怪建銘, 婚姻是兩個人ê代誌。一个若出代誌, 另外hit个mā ài檢討。建銘ê死, 我做某ê人定著ài檢討。而且我koh有三个囡仔ài顧。是--lah, 伊chiâⁿ雄, 我想講*Anna* khiau--去, 我koh kā囡仔生--落-來, 伊ē tng來阮身軀邊。想bē到, 落尾手, 伊soah自責*Anna*ê死, 選擇自殺。」

阮兩個人斟酌聽伊 leh 講，黃昏時 ê 日頭 kā 淑雅 ê 影 khiú kah 長長長，hō 人感覺 chiáⁿ 孤單，未來 ê 路 iáu chiáⁿ 遠，伊 lóng ài 家己行。我偷偷用目尾 kā lió，淑雅堅定 ê 眼神，我相信伊有法度度過 chit-chūn ê 難關。

A-him m̄ 敢問淑雅是按怎 beh kā 紅嬰仔號做「Anna」，是伊家己講--ê。

「平平查某人 lóng 想 beh 求愛情，查某人 lóng 對查某人真 bái，伊 ē-sái 體會 Anna 保守愛情 ê 心情。」

淑雅 bat 揣 Anna 談--過，請伊手 se 擲 hō koân，hō 伊規家伙仔團圓。Hit 當時伊 chiah 知 Anna mā 有身--ah，規個人 soah m̄ 知影如何是好。

「佗一个查某人 ē 讓？」淑雅 oân-nā 笑笑 leh 講，oân-nā 幌頭。

我 soah 起 ka-lún-sún，頭殼起烏暗眩，是聽著 Anna ê hâu 聲我 chiah 回神，原來 A-him 搶 beh 抱伊食奶。

愛 ê 誓言

「你 bat Anna--hōⁿ？」Hit 日 tng--來，A-him án-ne 問--我。我一時 m̄ 知 beh 按怎應。

「Chiáⁿ 久 ê 朋友--ah，mài 想 sioⁿ 濟。」Chit 時老實回答 khab bē 惹是非，心內想 to 無想隨 kā 應。A-him 無 koh 再問，che 是伊有智慧 ê 一面。過去就已經過--去--ah，記持 ē-tàng 留偌久？

台灣人 chiáⁿ 少開喙 leh 講「ài là-hù iú」，電視、電影不 sám 時 leh 講啥 mih 山盟海誓 kám 是真--ê？內心是真 phi-siòⁿ hia-ê 話。愛 ê 誓言 kám iáu 有人相信？愛有時親像一枝刀，ùi 心愛--ê ê 心肝窟仔 tùh--落-去。